

原輯南嶽志廿六卷

第八冊

南嶽志卷十二

平江李元度原輯衡山

王香余校刊
歐陽謙

前獻二

劉紹先

劉紹先衡山人明初歷官刑部郎性恬退歸耕南嶽下有驛使問其家紹先適操耒耜在田閒親指示之已乃具衣冠出揖驛使嗟歎而去又一日在田閒適舊僚友遣使遺以金幣旣指示其家歸受書而還其金幣其清節如此

茹瑤

明史本傳茹瑤衡山人年十六爲國子監生明太祖夜夢一人偉

貌修髯俯伏階下曰臣南嶽神也來輔陛下詰旦上幸國學見瑞
貌與夢中神相肖詢其籍則衡山人也奇之官至兵部尙書加太
子少保成祖卽位封忠誠伯歸里過長沙坐不謁谷王穗陳瑛劾
其違祖制下錦衣衛仰藥死瑞居官謹慎謙和有容其死也人皆
惜之

鄺埜

鄺埜字孟質號樸齋宜章人永樂辛卯進士官至兵部右侍郎死
土木之難贈少保諡忠肅嘗遊南嶽有登嶽詩見形勝

石恪

石恪蜀人多奇行隱居衡山永參峯南

鄺宏

鄺宏臨武人官教諭其先世鄺幼父修真朱明峯一日騎牛過羅浮訪蘇仙入朱明洞曰此南嶽前洞也復有鄺秋蟾宦成歸隱得秘書於石匣未幾化去宏攜長子彥譽尋先人仙跡曰盤桓五峯閒與雲朋霞友遊彥譽官副使多異政大學士商輅銘其墓曰冰清玉潔道骨仙風其人可知矣譽九子以少者居衡嶽以終厥志

陳獻章

陳獻章字公甫號白沙新會人宣德丁卯舉人以薦授檢討乞養歸卒諡文恭從祀孔廟本傳白沙平生夢想南嶽未果遊嘗作憶衡山詩其答李憲長書有云平生山水稍癖待明年服闋後採藥

羅浮訪醫南嶽上下黃龍洞嘯歌祝融峯以償夙願又與湛民澤書云近遣人往衡山問彼田里風俗尋胡致堂住處古人託居必有所見倘今日之圖可遂老腳一登祝融峯不復下矣是將託以畢吾生非事遊觀也後其門人湛若水來游既作甘泉精舍於紫雲峯下復建白沙書院以申其師未竟之志且爲之記

憶衡山詩身輕何處謝炊煙石洞松脂不計年尺牘已通南嶽主一丸還有白龍仙南嶽千尋雲萬尋丹青難寫夢中心人閒鐵笛無吹處又向秋風寄此音

案白沙生平未嘗至南嶽甘泉之記甚明通志乃謂其兩游衡嶽與諸生講學誤矣

吳紀

吳紀衡山人官郎中以忤劉瑾歸自號五峯道人著有貽清軒漫稿

夏良勝

夏良勝字于中號東洲南城人正德戊辰進士官至太常少卿事具明史本傳良勝兩以直諫杖謫風節凜然爲當世所重嘉靖初謫守茶陵與編修張治同遊南嶽時彭簪合衡山同至集賢峯良勝捐俸建集賢書院自爲之記

李承箕

李承箕字世卿號大厓嘉魚人成化丙午舉人閒白沙陳獻章講

學新會往從之遊白沙深器之爲作楚雲臺以居然第與登涉山水投壺賦詩縱論古今事獨無一語及道學久之承箕有所悟辭歸隱居黃公山不仕宏治庚申同方伯豫章涂半江憲副永豐鄭大石結侶遊南嶽時沍寒中冰花琅璫遍厯諸幽勝多所題詠二公舉酒屬爲文記之

張治

一統志張治字文邦號龍湖茶陵人正德庚辰會試第一官編修嘉靖初張璫桂萼用事不樂就職家居十三年與州守夏良勝同遊南嶽建集賢書院旣登朝銳然以辨邪正明黜陟爲先務累官文淵閣大學士與嚴嵩同朝悒悒不自得卒諡文隱隆慶初改諡

文毅

吳琛

吳琛繁昌人以僉都御史巡撫湖廣成化庚寅琛行部祇謁嶽廟見其敝圯慨然以修復爲已任時布政司參政稷亭甯英按察司僉事雲閒郁文博同行議合乃檄衡州守黃巖徐孚籌款興修以衡州衛指揮同知王綱赴川購巨木而都督李震亦助金三百兩越二年功成

潘九齡

潘九齡寧夏人官湖廣布政司參議嘉靖壬寅嶽廟圯九齡行部謁嶽集議重修官帑告乏勸輸於士民爭應之時巡撫爲嘉興陸

杰巡按御史爲開州史褒善布政使爲餘姚顧遂皆贊其議乃檄衡州別駕鄞縣楊美冕董其事工半楊遷去馬平王道繼之王又遷去陽朔王珵繼之凡三年乃成

王守仁

王守仁字伯安餘姚人宏治己未進士官至南京兵部尙書封新建伯諡文成從祀孔廟事具明史本傳先是正德間陽明忤逆瑾謫貴州龍場驛丞道經湘中弔屈賈寓嶽麓斤斤爲人講學至嘉靖初復與其徒錢德洪王畿徐愛輩遊南嶽日與衡士講學從者百餘人因各授以傳習錄又嘗以詩紀遊當是時朱張遺蹟久湮賴公過化有志之士多興起焉

葉釗

葉釗字時勉號豐川豐城人宏治壬戌進士南京刑部員外郎兩上封事觸劉瑾之忌坐誣被逮下詔獄廷杖除名銳然有求道四方之志乃涉洞庭浮沅湘息嶽麓登祝融之峯過石鼓覽朱張遺跡畱止者二年衡士如祝詠王珣歐陽遷等皆師事之瑾誅起禮部員外郎先生卒已七日矣衡人請於提學副使孫繼魯祀先生於書院位在朱張及黃勉齋之次

邱兆麟

邱兆麟字毛伯臨川人由進士官至布政使督餉湖廣時縱遊南嶽遇名勝輒畱題嘗作衡說衡雲說並祝融峯諸詩

湛若水

湛若水字元明號甘泉增城人宏治乙丑進士官至吏禮兵三部
尚書諡文簡事具明史本傳若水早承白沙之學以隨處體認天
理爲宗與姚江同學而異趣嘉靖甲辰年已七十有八因與武陵
蔣信有約遂自羅浮攜門人駱堯知周榮朱黃雲淡來遊衡山築
室紫雲峯之麓與衡士楊浩曹鳳朝等講學其中嘗爲衡陽祝黃
門詠撰响嘯書堂銘并書刻石合江亭久乃歸又十三年丙辰年
九十一復遊衡舟泊石鼓題詩講堂壁間再登南嶽棲遲凡數月
龐眉皓首步履如飛望之若仙人云

劉穀送湛甘泉歸南海序嘉靖甲辰秋甘泉先生自南海來遊

衡山時翁年七十有八居數月黻嘗爲文賦四詩送翁歸自後
數拜翁教札皆許再遊惜翁高年以至爲幸丙辰春翁壽躋九
十有一二月二十四日黎明忽鵲噪茅簷翁高弟謝生報翁至
未幾翁親往寒廬黻再拜見翁視聽聰明步履清健丰采儀度
一如宿昔知翁遐壽無量也蓋翁平日以理養心故心靜逸以
志帥氣故氣順適靜則精神內固順則體氣安和此所以高年
瑞老能爲衡山之遊也山川增重草木有光豈非南嶽一佳話
哉昔宋文彥博以八十任中書魏高允以九十相國事東漢張
蒼以百二十領度支唐李元爽以一百三十六入九老會翁年
視文高已過其歷碩德重望不當在度支之末即使世有白樂

天則亦駕胡果元爽光九老之會矣惟翁講明道學更事三朝
歷翰院宮輔國子祭酒權大司馬冢宰敷歷中外乃今引年閒
適於溪山煙雲之外鄙見以翁位端揆則丰采凝俊可以表儀
朝著參機務則運籌帷幄可以決勝千里任師表則廉頑立懦
可以風動多士所謂國有老成人非翁其誰耶草野閒情每懷
此意爲用人者獻也翁向南歸轍有詩茲再次顏字韻送翁仙
駕并續前序惟翁取其意而略其詞云

顧璘

顧璘字華玉號東橋上元人宏治中進士官至尙書事具明史文
苑傳以詩古文鳴名在七子中官湖廣巡撫時嘗奉命祀南嶽周

覽其勝作遊衡嶽二記及遊方廣詩

鄒守益

鄒守益字謙之號東廓江西安福人正德辛未試禮部第一廷試
第三人及第官編修以議禮下詔獄謫判廣德州起郎中終南京
國子祭酒諡文莊師事王陽明以講學名天下從遊者日至嘗登
嶽憩方廣寺有詩遂建東廓書院於南臺左子善號穎泉嘉靖丙
辰進士官至太常寺卿孫德溥號泗山萬曆十一年進士官洗馬
並以文章儒術著聲隆萬閒先後遊衡嶽有詩王夫之曰三世登
嶽唱歎相躡明興一氏而已

劉敞

一統志劉黻字伯繡號岳亭衡陽人正德丁丑進士授行人武宗南巡黻等會同榜進士百有七人上疏切諫跪午門三日黻被杖八十改南京國子監學正世宗卽位擢御史巡按四川有威望告養歸遂不復出湛若水鄒守益嘗過所居歎曰入劉君室使人名利之心俱盡若水遊嶽黻作序以送之又作重修嶽廟記

徐愛

明儒學案徐愛字曰仁號橫山餘姚人正德三年進士官南京工部郎中王陽明先生之妹婿北面稱弟子及門莫有先之者陽明嘗曰曰仁吾之顏淵也曰仁嘗遊衡嶽夢老僧撫其背而歎曰子與顏子同德亦與顏子同壽覺而異之卒年果三十一

王宗沐

王宗沐字新甫號敬所臨海人嘉靖甲辰進士在比部時與王元美結詩社七子中之一也後師事歐陽南野以理學顯官至刑部侍郎嘗遊南嶽與同志講學衡山人康元積從之遊後元積舉進士適出其門因築會靈精舍購田以祀其主

王綱

王綱先世居高郵明初以軍功世襲衡州指揮僉事遂爲衡陽人綱官江西都使司指揮僉事成化中郡人給事中劉昊請於朝重修南嶽廟部推綱能檄入川採木歸督造廟歸然帝制崇麗冠五嶽所費不過五千金皆公所區節也事具商文毅輅所撰碑及其

七世孫夫之所作行述

劉穩

劉穩字朝重號仁山鄆人嘉靖丙辰進士官至南京太僕寺卿爲廣東僉事時備兵南韶計擒山寇降獍賊粵人肖像祀之初從郡守蔡汝柑講良知之學告歸後結廬衡山與學徒重訂舊業又構精舍於迴雁峯之麓鑿石爲洞日宴坐其中巡撫趙賢題曰龍雁書院因自號龍雁山樵

蔣信

蔣信字卿實號道林武陵人嘉靖十一年進士官貴州按察司副使引疾歸築精舍於桃花岡學徒雲集遠方來者卽以精舍學田